


Paano nagkakulay ang mundo

?



Isinulat ni Junna Marie H. Nimes
Iginuhit ni Jerry Ben V. Sasam
Kinulayan ni Neil Edward D. Diaz

PANIMULA

Ang lahat ng bagay sa mundo ay may pinagmulan. Isa sa mga paraan upang maisabuhay ito ay sa pamamagitan ng pagkukwento. Napakahalagang karanasan sa bawat batang Pilipino ang makatuklas ng kakaibang bagay na siyang tutulong upang mahubog ang kanilang kaalaman. Sa pagbabasa ng kwento mula sa libro, makapaglalakbay sila sa kakaibang mundo na punong-puno ng hiwaga.

Ang kwentong ito ay nakabatay sa K-12 Standards and Competencies for Five-Year-Old Filipino Children na nag-aaral sa Kindergarten. Nakahanay ito sa Domain E. Language, Literacy and Communication (LL) na may kaugnay na batayang Visual Perception and Discrimination (VPD). Natutukoy dito ang kasanayang “Naisasabi ang kaibahan ng mga bagay at larawan base sa kanilang kulay, porma, sukat, direksyon at iba pa (LLKVPD-Id-1).”

Malalaman din ang Domain G. Understanding the Physical and Natural Environment (PNE) na may kaugnay sa batayang Earth Science: Environment and Weather (E). Natutukoy dito ang kasanayang naisasabi at naisasalarawan ang iba’t ibang uri ng panahon tulad ng tag-init, tag-ulang at maulap (PNEKE-00-1).

Sa mga guro o mananalasay, layunin ng bawat isa sa atin na buksan ang isipan ng bawat bata at punuin ito ng karunungan upang maging gabay nila sa pagtuklas ng makahulugang karanasan.

Hikayatin at pagtibayin natin na ibang iba pa rin kung ang bawat batang Pilipino ay bumabasa ng mga kwento sa libro.

- May-Akda



Noong unang panahon, isang Prinsesang Diwata ang binigyan ng regalo ng kanyang Amang Bathala. Ito ay hugis bilog at punong-puno ng iba't ibang bagay na may buhay at pinangalanan niya itong "Mundo".

Unang nilikha ng Prinsesang Diwata
ang taga-kulay na sina Itim at Puti.



Si Itim ang naatasang
magpanatili sa hugis
ng bawat bagay sa
mundo at si Puti naman
ang kumukulay.





Ngunit napansin ng Prinsesang Diwata na parang may kulang.


Wika niya, “Ano kaya ang kulang sa iyo? Alam ko na! Dapat magkaroon ka ng iba pang kulay!”



Kaya nilikha niya ang bagong mga taga-kulay. ito ay sina Dilaw, Bughaw, Luntian, Pula, Kayumanggi, Dalandan at Ube. Bawat isa sa kanila ay binigyan ng responsibilidad.



Si Dilaw ang palaging kumukulay kay
Haring Araw upang manatiling maliwanag
ang kapaligiran.



**Si Bughaw ang kumukulay sa katubigan
at kalangitan.**



Kay Luntian naman ang mga dahon ng
mga puno at mga halaman.





Si Pula ang kumukulay sa lahat ng
mga bunga ng puno ng mansanas kaya't
sobrang sarap at tamis ng mga ito.

Si Kayumanggi naman ang kumukulay
sa kalupaan.




Si Dalandan ang kumukulay sa iba't ibang
mga bulaklak at sa mga dahon ng puno
tuwing taglagas.



At si Ube naman ang kumukulay sa mga sariwang gulay at putas tulad ng talong at ubas.





Dahilsa mga bagong taga-kulay nagkaroon
ng buhay ang lahat ng bagay sa mundo.



Isang araw kinausap ni Prinsesang Diwata si Puti. Wika niya, “*Huwag mong hayaan na makulayan ng iba ang mga ulap, lalong-lalo na ni kulay Itim...*”



“...sapagkat hindi maganda ang mangyayari.”




Dahil sa inggit ni Itim sa mga bagong kulay, naisipan niyang haluan ang mga ulap ng kulay itim.





Kumulog, kumidlat at biglang bumuhos ang malakas na ulan na nanggagaling sa mga ulap.

Nabura ang mga kulay ng lahat ng bagay sa mundo at unti-unting dumilim ang buong paligid.



Sa pagkawala ng lahat ng kulay, naipakita ni Prinsesang Diwata kung ano ang mangyayari kapag kulay lamang ni Itim ang mangingibabaw sa mundo.



"Patawad po, Prinsesang Diwata," pakiusap ni Itim.

Naawa si Prinsesang Diwata at upang di na mainggit pa si Itim, inatasan niya itong kulayan ang kalangitan tuwing gabi.




Gumawa rin si Prinsesang diwata ng panibagong kulay na mula sa bukang-liwayway, ito ay si Indigo.



Sa tulong ni Indigo, ang lahat ng taga-kulay ay nagkaisa upang muling maibalik ang liwanag at kagandahan sa mundo.





Lumikha sila ng isang bahaghari upang maibalik ang kulay ng mundo. Ito ay nagsisilbing paalala na ang bawat unos ay kayang lampasan.



Mula noon, namuhay na nang
masaya ang mga taga-kulay...
nagkakaisa kahit nagkakaiba.



Tungkol sa MAY-AKDA

Si JUNNA MARIE H. NIMES ay nagtapos ng Bachelor in Elementary Education Major in Pre-school Education mula sa Arriesgado College Foundation Inc., taong 2016. Ito ang kanyang **naging** unang libro. Sa kanyang kabataan, siya ay tulad din ng ibang **bata** na nasisiyahang makakita ng bahaghari. Dito niya hinango ang inspirasyon para **mabuo ang kwentong ito**.

Ngayon, siya ay nagtuturo na ng Kindergarten. Nais niyang maibahagi ang kagandahan ng bawat bagay at ang kulay na taglay nito. Nais din niyang bigyang-diin ang hindi magandang dulot ng pag-iimbot at inggit sa isang indibidwal. Datapwat ipamalas ang pagpapahalaga at pagrespeto sa pagkakaiba ng bawat isa.

- May-Akda

Ang mundo noon ay may dalawang kulay lamang, Itim at Puti. Ngunit paano kaya ito magkakaroon ng iba pang kulay na magbibigay ng buhay sa lahat ng bagay sa mundo?

Sa kwentong ito maipakikilala ang iba't ibang kulay. Ito rin ay maghahatid ng aral kung paano tinanggap ni Itim ang mga pagbabago sa mga bagay na kanyang nakasanayan.

